

icatores; quia ipse D. Rodolphus inimicabatur eidem Musatto cum quibusdam aliis ad mortem.

*De representatione passionis Christi, & ludi Dei, ut ita dicam.*

Anno Domini M. CCC. IV. facta fuit per Clerum, sive per Capitulum Civitatense representatio, sive factae fuerunt representationes infrascriptae. In primis de creatione primorum parentum, deinde de annunciatione Beatæ Virginis, de partu & aliis multis; & de passione, & resurrectione, ascensione, & adventu Spiritus Sancti, & de Antichristo & aliis, & demum de adventu Christi ad iudicium. Et prædicta facta fuerunt solemniter in Curia Domini Patriarchæ in Festo Pentecostes cum aliis duobus diebus sequentibus, præsentate Rev. D. Ottobono Patriarcha Aquilegensi, D. Jacobo quondam D. Ottonelli de Civitate Episcopo Concordienfi, & aliis multis Nobilibus de Civitatibus & Castris Forijulii, die XV. exeunte Majo.

*De morte Illustris Viri D. Alberti Comitis Goriciæ.*

Anno Domini M. CCC. IV. Nobilis Vir D. Albertus Comes Goritiæ obiit Lonyz, & sepultus fuit Rosacis in Vigilia Nativitatis S. Mariæ: & factae fuerunt ibi magnæ oblationes in die suæ sepulturæ. Dati fuerunt XL. denarii Aquilegenses unicuique Sacerdoti.

*De creatione duarum Præbendarum per Ven. D. Bernardum Decanum Civitatensem.*

Anno Domini M. CCC. IV. Ven. D. Bernardus, Decanus Ecclesiæ Civitatenfis, fecit & de novo creavit Presbyteros, Aynzium die ... & Andream filium Dominæ Benvenutæ die octavo intrante Octobri, suos Præbendarios in Majori Ecclesia Civitatenfi; quibus dedit certos redditus, & proventus. Et eodem anno facta fuit sibi gratia in Capitulo Civitatenfi per Capitulum, quod eisdem Presbyteris & suis Successoribus non ponerent aliquas collectas: tali quidem conditione & pacto, quod prædicti Præbendarii singulis diebus dicere teneantur, unus ad Majus Altare summo mane, & alter dicta Missa Majori in S. Johanne Baptista certas & determinatas Missas, ut in ipsius Ordinatione plenius continetur: & quod ipsi teneantur continue interesse Officiis canonicis.

*De nive grandi.*

Anno præscripto, in Festo B. Blasii, incepit ningere in Civitate: & fuit illa nix tam magna, quod non fuit homo qui dixisset, se unquam vidisse in Forojulii ita magnam. Et fecit damnum valde grande de arboribus, & specialiter pomiferis. Et diruit plures domos: & specialiter in Tulmino destruxit villas, & domos quamplures; ubi mortui sunt homines, & bestiarum satis multæ. Quæ nix duravit in Civitate bene XV. diebus in Aprili.

*De captione Speyngenberch.*

Anno Domini M. CCC. V. die ultimo Junii, Nobilis Vir D. Rizardus, filius D. Girardi de Camino, obsedit cum magna multitudine equitum & peditum Castrum & locum Speynberch; in cuius subsidium & juvamen Dominus Marchio Ferrariensis misit gentem suam: & insuper Illustris Vir D. Henricus Comes Goriciæ, cognatus dicti D. Rizardi, personaliter venit cum magna gente bene parata: & Nobilis Vir D. Meynardus Comes de Orrumbruch venit etiam personaliter ad dictam obsidionem, qui erat similiter cognatus ipsius D.

Rizardi. Dux Carinthiæ misit etiam ibi gentem suam. Forojulienfes quasi omnes venerunt in subsidium ipsius D. Rizardi. Omnibus ibidem congregatis, inceperunt machinis, ballistis, aliisque ædificiis expugnare locum ipsum, & eis incontinenti acceperunt aquam. Et ita obsederunt eundem locum, quod inde nullus exire poterat. Quem quidem locum certis pactis, postmodum minime observatis, ut dicebatur, eidem D. Rizardo sponte dederunt, die IV. Augusti.

*De verra inter Dominum Patriarcham, & D. Rizardum.*

Item anno Domini M. CCC. V. Rev. Pater & D. Ottobonus Patriarcha Aquilegensi exivit Utinum die VI. exeunte Septembri cum gente sua, & gente Domini Ducis Carinthiæ. Qui Dux Carinthiæ pepigit fœdus certis pactis habitis cum Domino Patriarcha: videlicet, quia Patriarcha concessit Duci loca sua, quæ sunt in Carinthia; & ipse Dux promisit juvare Dominum Patriarcham & Aquilegensem Ecclesiam pro posse suo. Qui Dominus Patriarcha ivit ad S. Vitum: & Civitatenfes, & Utinenfes, & pauci Castellani venerunt ibi. Et prædicto die, scilicet VI. exeunte Septembri, Religiosi Viri Frater Albertus Vicarius Domini ... & Fratres Augustinus, & Enoch ejus socius, & Nobilis Vir D. Zanatus Miles & familiaris Domini cum filio, venerunt Sacilum, volentes D. Rizardum de Camino ex parte Domini rogare, quod Sacilum, & Canipam, & alia loca Ecclesiæ Aquilegensi reddere deberet. Quæ reddere recusavit: & prædictos Fratres, & D. Zanatum cum filio, Ambasatores Domini super prædictis, cepit & eos incarceravit. Dominus vero Patriarcha stabat ad S. Vitum: & gens sua, & Ducis aliquando ante Valvesonum, aliquando ante Speingberch, & contra inimicos diebus singulis equitabant, tam amicis quam inimicis nocendo. Et in Meduna Dominus Patriarcha faciebat fieri pontem, unde posset ultra flumen Luenzæ transfretare. Ex alia parte fluminis erat gens D. Rizardi cum ædificiis suis bene munita, & non permisit dictum pontem complere, nec in aqua ponere. Deinde factae fuerunt trevæ inter Dominum Patriarcham, & D. Rizardum usque ad Festum S. Georii: & in Vigilia Omnium Sanctorum Dominus Patriarcha rediit Utinum cum gente sua.

*De verra inter Civitatenfes, & D. Johannem de Teyzano.*

Anno Domini M. CCC. V. die Lunæ XI. intrante Octobri, veniens D. Paulus, Capitaneus Tulmini, de Tulmino, combussit Massariorum domos D. Johannis de Teyzano, qui erat contra Dominum Patriarcham: & etiam combussit domum Camocii, qui est prope pontem Alzidæ super ripam Natissæ. Ob hoc D. Johannes motus, cepit Leonardum filium Everardi de Civitate, & quemdam Calcificem de porta Brassana, & duos alios ... & accepit boves, & armenta, & castros bene in magna quantitate Macelatorum de Civitate, quæ erant in Syniruelt in pascuis ipso die. Civitatenfes statim miserunt nuncios ipsi D. Johanni, qui relaxaret homines, & animalia redderet. Qui cum reddere noller, eodem die & etiam die sequenti Civitatenfes combusserunt, & roncaverunt ipsum D. Johannem usque ad muros Castri.

*De captione D. Odolrici de Castello.*

Anno Domini M. CCC. (a) die IV. intrante De-

(a) Sic in Codice.